

Pravosuđe ne smije biti predmet političkog pritiska



OHR izražava žaljenje zbog činjenice da su najviši zvaničnici Republike Srpske pribjegli neodgovornim komentarima o optužnici podignutoj protiv gospodina Ivanića i njegovih saradnika. Takvi komentari dovode u pitanje javne izjave istih tih zvaničnika o tome da su oni protivnici organiziranog kriminala i korupcije, te ugrožavaju nezavisnost pravosuđa i sugeriraju da bi neki ljudi trebali biti iznad zakona samo zbog svog političkog položaja.

OHR nema ništa sa optužnicom protiv gospodina Ivanića. No, OHR je svjestan da je, u vrijeme kada je PDP bio na čelu vlade, rukovodstvo Srpskih šuma izazvalo veliku zabrinutost međunarodne zajednice, između ostalog i zbog svoje uloge u pružanju finansijske pomoći bjeguncima optuženim za ratne zločine. Ta zabrinutost rezultirala je nizom reakcija međunarodne zajednice, kao što su revizije koje su otkrile velike probleme u okviru Srpskih šuma, finansijske sankcije SAD-a protiv Srpskih šuma, nakon čega su uslijedila i ograničenja putovanja za neke od lidera PDP-a.

Činjenica da je stranka gospodina Ivanića odlučila da krene sa simboličnim napadom na OHR i bonske ovlasti tek nakon što je gospodin Ivanić saznao za mogućnost podizanja optužnice jasno pokazuje da je svrha te inicijative da skrene pažnju javnosti sa ozbiljnih optužbi protiv njega i njegove stranke. Činjenica da je ovu inicijativu pokrenula osoba koja je i već sama osuđena za korupciju dovoljno govori sama po sebi.